



贛屬舊十二區素稱巖險乘墉伏莽之事至康熙二
十年始靖故保障江城視地方為尤急昔人築城鑿
池率皆襟山帶澤據一邑扼要生長是邦者亦徃徃
思患預防不怠鳩屨修城令下贛與雩都信豐三城
士庶輸將恐後餘悉鞏固不勞版築可想見太平永
久稱鼓之不鳴矣若夫立廨舍以居官度廛地以居
民崇壇壝祠廟以事神祇建倉庫闢權以資儲備而
裕國課皆冬官工役所不得已者也作建置志
府城池贛縣附郭

贛州府志

卷十一

府城池

贛州府城始自漢高祖六年庚子使灌嬰略定江南立贛

縣城以防趙佗即今府西南益漿溪本太平寰宇記

晉大康末徙於葛姥故城內

按輿地志云葛姥者漢末避黃巾賊出自交趾貲財
鉅萬僮僕數千於此築城為家歿後有靈異人因立
祠祀焉虔州圖經云晉大康末洪水橫流忽有大鼓
隨波而下入葛姥故城衆力齊曳躡而不動卜於其
地置縣吉遂徙以就焉又圖經稱章貢二水合流為
贛其間置邑因為贛縣以字釋地酈氏非之辨見山
川志

東晉永和五年己酉太守高琰置郡城於章貢二水間

義熙二年丙午徙於贛水東

宋爲南康國城於雩都

梁承聖元年壬申復歸於章貢間

按名勝志云舊城基在林華坊今古城巷是

唐末盧光稠廣其東西南三隅鑿址爲隍三面阻水

宋熙寧中知軍劉彞開水總以防城內水患孔宗翰因

貢水勢趨東北隅城屢衝決甃石當其蓄處冶鐵錮基

峙八境臺於城上後知軍梁繼祖趙繼善趙公儼陳輝

高夔張貴謨楊長孺鄭性之相繼加葺

元詔天下無修城池日就毀圯至正十三年癸巳四方

兵起監郡全普庵撒里乃復增築十八年戊戌秋九月

贛州府志

卷十一

府城池

二

僞漢兵攻五閱月城陷其將熊天瑞據之稍加修理

明初吳二年乙巳指揮楊蘆重修

成化二十一年乙巳知府李璉宏治六年癸丑知府周

鳳繼修九年丙辰都御史金澤開鎮於贛檄知府何珖

推官張瓛增高三尺十三年庚申都御史韓邦問葺之

正德六年辛未都御史周南繕治一新十年乙亥春霖

圯一千三百餘丈十三年戊寅夏久雨圯六百三十八

丈知府邢珣後先白於都御史蔣昇王守仁修補完整

已郊庚辰連歲復圯三百四十餘丈兵使王度檄知府

盛茂重修嘉靖十三年甲午都御史陳察增卑培薄益

壯舊觀逾年告成糜帑金七千有奇尚書羅欽順祭酒

鄒守益記之

羅記云凡郡邑所治必有城焉所以盛受民物也民居於是乎奠圖籍於是乎藏錢穀兵甲於是乎儲衣冠文物於是乎萃關乎政體誠亦重矣故設險守國聖經明以爲訓况乎利害所繫有不止於一郡一邑者其於圖維經久容不加之意哉贛之爲郡宅江西之上游當五嶺之要會其地與閩廣湖湘諸郡邑犬牙相錯地既巖險故其民或不盡馴乃宏治八年朝廷特制都御史一員奉璽書握兵符建行臺於贛以鎮撫之而茲郡遂爲重鎮所賜履西起湖之榔桂以接於南安跨廣之雄韶惠潮東躡閩汀漳以薄於海凡爲道五爲府若州九爲

贛州府志

卷十一

府城池

三

縣五十八自其三司而下皆聽節制贛城周十有三里國初因前代之舊繕治一新百數十年來隨壞隨葺行臺既建則議者多病其高厚不足非所以重根本也嘉靖癸巳瓊山唐公平侯實當是任爰采羣議將增築之會移撫山東於是常熟陳公原習來爲之代議以允谷登城達觀具得其實蓋薄者十六七卑者十二三且探敵無串樓守望之舍率淺陋而稀濶經畫既定乃令羣工埤薄增卑務令齊一缺者補陋者闢無或不周屬副使邵煉暨知府顧可久董治之選文武吏士之才者通判陳琦程文等分理其緒公復時一臨視以獎其勤工興於是年季冬至甲午仲冬始畢所用磚堊木瓦諸物

共計若干皆市以平贖人工計萬幾千幾百工率均之募兵費鹽稅白金七千數百餘兩樓櫓飭備俾堞完新庶隅峻整內壯保釐之形勢外聳望走之觀瞻風動萬山之中庇及百城之遠其所盛受者既大而爲利亦無窮矣詩云迨天之未陰雨徹彼桑土綢繆牖戶今汝下民或敢侮予斯役也於是詩其有合哉公蓋深於詩者節儉正直美麗羔羊勞來安集功光鴻鴈地利人和於焉兩得之矣欽順吉產也距贛伊邇實同厥慶故樂記斯役之成爰授謝推官宗孔以歸俾鑄諸石庶幾來者念功之不易相與嗣守之惟謹云

三十五年丙辰大水城墉傾塌益多都御史汪尚寧兵

贛州府志

卷十一

府城池

四

使游震得知府王春復大修四十一年壬戌都御史陸穩以形家言開興賢門尋塞嘉靖末知府黃宸萬歷間知府徐應奎黃克纘柯鳳翔相繼修城三十五年丁未各城樓鋪頽塌都御史李汝華檄知府陸化淳委經歷戴金臺縣丞李乾蔭督修糜帑金九百七十兩有奇三十七年己酉都御史牛應元復開興賢門未久復塞四十二年甲寅遭水各門俱有倒塌都御史孟一胤發帑金四百七十兩委典史陳一訓董築四十四年丙辰復遭水圯又發帑金一千九百五十三兩檄知府楊瑩重修天啟元年辛酉春夏淫雨衝壞知府余文龍申請守道王化行都御史周應秋支稅銀一千九百八十兩修

崇正十三年庚辰贛撫王之良易雉堞爲平塚增高三尺

國朝順治三年丙戌建春湧金西津各門樓俱焚十二年乙未知府郎永清修復建春西津二樓康熙二年癸卯望江樓火焚贛鎮姚自強修建丙辰丁巳間巡撫佟國正守道王紫綬檄知縣郭毓秀修葺四十三年甲申大水城堞傾倒百餘丈知府朱光圉倡各縣知縣捐俸補修計貲七百餘兩五十八年己亥復傾百餘丈知縣張瀚修葺乾隆八年癸亥歲久漸傾知縣張照乘署知縣馮淳請帑支鹽規銀九千一百五十三兩修葺並繕治各門城樓後復圯九十餘丈二十五年庚辰知府朱宸

贛州府志

卷十一

府城池

五

知縣沈均安勸捐銀三千五百八十兩修葺

按贛州城垣周迴十一里零八十九步共二千五百一十二丈崇三丈爲警舖六十有三雉堞四千九百五十有二地形南衍北銳東北二面阻江爲險自西津門起至鎮南門有濠計長五百五十二丈濶一十三丈深淺不等又自南門起至百勝門計三百八十五丈深五尺有奇濶一十四丈舊有十三門其永平後津朝天永通貢川安教巽川興賢八門已塞今開者五東曰百勝南曰鎮南西曰西津東北曰建春北曰湧金各建樓其上百勝鎮南闔闔各二層東門城樓有太砲臺一座大砲七位南門城樓大砲三十七

位西門大砲六位

宋文天祥贛州詩云滿城風雨送淒涼三四年前此戰場遺老猶應愧蜂蟻故交已久化豺狼江山不改人心在宇宙方來事會長翠玉樓前天亦泣南音半夜落滄浪 明汪廣洋贛城水東詩云煙江水花淨風潭雲樹齊倒簾懸宿鳥絕壁挂晴霓岑嶺步忘返空冥思欲迷塵纓如可澣予亦賦幽樓 國朝程可則贛州詩云章江迴合女墻低不見行人但鳥啼往日聊城誰射矢至今函谷未封泥風吹舊巷惟沙礫日落前營尚鼓鼙欲上鬱孤臺上望亂雲殘雨草萋萋 王紫綬登虔城感賦詩云虔州遙隸古洪都千里西南此一隅印淠合兵

贛州府志

卷十一

府城池

六

賢濟北陳吳傳令假扶蘇怒潮海射東西浙血浪湖漂大小孤此地書生曾建節時時風雨吼昆吾 官衙蕭索似寒窻徒手登陴血滿腔百粵車書餘一嶺七閩衣帶接三江王敦門第甘生負李廣功名恨殺降便欲短衣隨獵馬雲中鷗影正雙雙 東汀西桂柝相聞幾處灰飛劫火焚井臼行間添婦子樓船天上下將軍瘴鄉濕枕城頭霧澤國腥橫戰後雲四面敵來皆不少獨將孤劍倚斜曛 耻將生計語家人委命疆場又一春幾見漢庭歸陸賈旋聞蠻海屬盧循權移主爵無除吏寵冠諸王有賜緡自是不才留滯久誰憐天末老孤臣 勦撫經年總不成逢人羞說請長纓長安不返吳王子

嶺右猶稱徵貳兵雙羽檄來飛五夜一朝衙罷飯三更
此中別有關心事相繼星芒落夜營 郡外山高面面
齊楚氛纔隔晚霞西西川鼓角喧三峽南詔烽煙照五
溪雲擁虎貔盤竈滿月明鴻雁壓城低板橋茅店無尋
處日落空郊鬼自啼 不平終日對吳鉤十郡城空只
上游纔報公孫收益部復傳僕固據梁州閨中夢斷河
邊骨馬上裝宜塞外表多少旄倪還悵望盈盈笑語上
朱樓 四野燐青野火燒轅門深坐霍嫖姚寇多藍縷
山連楚將忽椎箕地叛潮藪谷箐稠猿臂短柳營芻飽
馬蹄驕同時七國皆如此鼉錯何曾負漢朝 幾處脫
巾戈倒持盱江今已駐 王師圍樊謾道呼倉葛舍墓

贛州府志

卷十一

府城池

七

仍聞勲負羈閫外借才衙纛早軍中需吏墨衰宜嶺梅
開徧家郵斷驛使何由寄一枝 聞道 天家日築壇
黑貂白馬紫金鞍孟明陷久仍還職卜式功高合拜官
自古山河爭二陝於今精銳盡三韓丈夫馬草尋常事
莫作諸侯壁上觀 葉燮贛州詩云設險資形勝雄關
扼百蠻倦遊人欲住行役路方艱事去江山舊時平樓
櫓閒文成勲業地樽俎尚堪攀 朱彝尊虔州懷古詩
云橫浦樓船盡西風草樹凋城荒百戰在地入九江遙
豪傑爭先後山陵愴寂寥鬱孤臺下水流恨自南朝
魏禮登虔城詩云層山二水繞雄城四面烽煙接境生
愁見桃花開處處爲憐芳草故行行賦詩自昔曾驅賊

飲酒從看善用兵喜得王公臨此地會教桶漉早能平
李紱贛州府詩云峒峩八境臺兩水控襟帶微颺鷁
首迴沿濠破輕靄雄州蔽炎荒土服大無外戍營爭地
勢颿旌激天籟鱗鱗萬煙火叢雜不容汰王程將事亟
鄉國采風味候迎冠蓋煩撫拾輶軒慨民勞汔小康保
障此都會 張映辰虔南懷古詩云憑高試望鬱孤臺
此地曾經百戰來楚粵煙嵐杯底合江山遠近座中迴
泉飛晴日常疑雨灘急雲陰欲起雷多少興衰餘感慨
角聲吹動夕陽哀 虹流浪湧翠涓涓妙語爭從玉局
傳南嶽慈雲開馬祖西風橫浦靜樓船空餘八境亭臺
蹟可有雙江唱和篇一葉梧桐秋信早起看殘月已如

贛州府志

卷十一

府城池

八

經 黃世成次韵云江城八境起層臺信國遺風自古
來府號忠誠人慷慨城名鐵石水滌迴峰嵐映閣天浮
玉灘響驚舟地起雷閩粵蠶叢悲遠道猿聲清夜楚山
哀 徐垣虔州懷古詩云崆峒南望鬱崔嵬八境雄圖
亦壯哉烽火昔時連郡國笙歌今日徧樓臺千年不改
河山色半壁誰堪保障才覽罷風謡還自惕迂踈何以
慰蒿萊 虎頭城下逸漣漪章貢名都六代垂庾嶺梅
關天設險江花巖草物多竒文成開府全師日茂叔談
經佐郡時欲覓芳踪何處是鬱孤臺畔夕陽遲

街市附

東門曰百勝門坊曰寅賓一曰崇孝長街舊志所稱是爲

直坦軌道迤南曲徑通金家井稍前委巷爲古馬藥巷俗訛馬齊巷麻資巷志稱盧光稠時始擴其城於東南則瀕江渚渙皆爲光稠蕃牧地曰馬藥曰馬市曰馬營曰馬路歷代相沿矣又前爲闔富巷又前經左營衙署達水塹口地窪下有水門蓋洩城東南之水也舊作水站誤上有橋曰度龍橋旁則廬舍鱗集其高出者爲夜光山巷爲草城巷直前爲誠信街迤左爲壽量寺太尉廟前改逕爲油底巷即油槽巷達東門井古義泉也董志曰義泉坊先賢書院爲宋澹軒楊先生故宅改曰義泉是爲五書院之一其四書院曰正蒙在金魚坊曰鎮寧在察院前曰富安在祥符宮謝志又曰夜光曰澄清

贛州府志

卷十一

府街市

九

在青龍井皆陳蹟也出井前即南市街上接世臣坊街右小巷爲古觀巷通三官廟旁爲大濟倉舊志之登雲坊也亦宋貢院取士地叅府在其右今爲權使署署前曲巷通忠節營俗訛爲弓箭營迤前通萬壽宮

今改
贛縣

學左爲城隍廟後與三官廟對者爲楊判巷廟左直下爲賣菜坡皆出南市街兩對巷爲太尉廟井巷爲木橫井巷入巷岐逕逶迤多池塘園圃茂木濃陰所爲水木洞也地宅雲連者昔爲許氏新府今易民居馬藥闔富羅家諸巷通焉水木洞之高出於南市街者爲桂家嶺獅姑嶺入巷有井出巷左入南市街右經羅家巷口達五顯廟前右轉爲塔下寺經社倉慈雲寺塔在寺內塔

其左小巷亦曰謝四巷達鎮署前大街又前爲武學巷
以前爲白衣巷旁有井曰皇華井今堙井右小巷亦通
武學對巷即鎮署道署蓋舊使院古館驛前又曰皇華
巷或曰行人故坊名也華萼坊疑舊志之華萼巷在其
左右經般若菴稍前有巷曰白塔巷昔人開池得白石
塔巷因以名或又謂即華萼巷又前爲贍均庫巷巷左
即總鎮署署西南曲巷有井亦曰黃土井過署爲四路
口東接叅府前南徑江東廟北爲青龍井舊志之澄清
坊也稍前小巷曰絲髮巷皆鎮署左路大街又前至青
石坊爲謝春坊少南立今圯左一巷爲熊盛巷訛爲城
西洪成巷巷有井名牛皮井今亦智井矣坊右稍前有

巷爲花街巷達白塔對贍均庫巷大街又前爲孟衙巷
對靈通廟廟右爲古尚書街達龍虎井一直統鎮署後
井旁即白塔巷對井爲普濟菴左一巷直達鎮南廟從
靈通廟稍前左轉委巷爲九曲巷故馮衙巷也過巷口
即軍院前慶院署在焉今爲分巡道署矣院前有池曰
鏡池亦曰鳳凰池經院左爲都倉廟即老倉故址過倉
前爲鎮南廟經八角井達會府本贛州衙署左有贛衙
義學前有五寧樓於贛五門道路適均地之中也院右
即大街經西爲老道前院署後爲牛衙巷通府學前
由西津門入坊曰孝義曰孝善街曰西街舊志曰橫街
直抵湧金門南迤城曲北轉即洪成巷經道署西南可

通衢熊盛二巷指熊盛為洪成者承訛也稍前為雷屋巷又前為馬札巷分巡道署右巷也今改為府治巷盡處為張公廟廟側巷為張公廟背署前直達洪成巷曰金圭嶺者疑即龜嶺之訛署東南汙池空濶處為清水塘明劉孝廉曰价涉園池在昔賈軍宅後署左為鐵櫃塘又前為塘舊分守道署也今為道倉又前為天一閣後巷出新開路迤右即馮衙巷巷口井俗謂楊老井古碑為鎮寧井不數武出大街軍院前西街又前左小巷為鹽倉巷又前為王將廟巷巷通花園塘對巷為新開路明郡丞盧觀象宅在其右宅前有池深廣直鐵櫃塘西街又前為縣學今學宮移復東隅紫極宮而舊學改建為萬壽宮左為上諭亭學後

贛州府志

卷十一

府街市

十二

為鬱孤臺臺西為花園塘臺東北為王城盧光稠僭擬地也隋大業間則有鄱陽林士宏嘗據虔稱南越王矣王城之稱其來已久而或者訛王為皇矣其實矣宋以後皆為府治今為學使署東西文場前有宣明樓樓踞甕城上又前為四賢坊相傳為宋趙清獻周濂溪劉都丞文信國立坊左右皆有井所謂獅子兩泉也右井久堙康熙戊寅郡守王用霖清出得鐵井欄井前為豆市地坊下交衢四達西接縣學今萬壽宮東接縣治直前為州前沿舊州治得名左為均井巷右為新開路稍前為天一閣閣下井為太陰井閣右小巷為瓦子巷通天一閣後巷今以照磨巷名之過閣即軍院前對閣為府學前

舊志之瓦市街也學右爲王文成公祠學左爲名賢祠
祠左爲唐子巷又前爲佟公祠祠對街爲八角井又前
爲排頭街金魚坊內有池即金魚池池有巷過池又爲
池隔巷今塞太守黃宸於池上建書院即舊文昌閣是
爲會府後 由湧金門入坊曰鳳池曰通利街曰橫街
街口又爲鎮遠鋪北繞垣下爲馬路巷又前爲上下寸
金巷又前南路爲米市街胭脂巷在其左今塞藩竿巷
紙巷在其右過紙巷口爲樟樹街極於行司廟橫街又
前南轉爲攀高鋪達藩竿巷北轉爲靈山廟前寸金巷
又繞出於右左有巷達白家嶺曲通縣城隍廟後白馬
廟前巷內井爲白家井又前有巷達東溪寺對巷不數

武即靈山廟右井爲橋口井今塞從橋口右轉繞出靈
山廟後爲李王塘近城脚即馬路巷小橋覆處有水門
福壽溝水之所從出也徑北達八境臺從橋口一直達
朝天門城北門也門久塞左側小井名朝天門井徑達
章貢臺繞舊府治後而白鵲翠玉月華皂蓋諸蹟咸於
此求焉從橋口繞府治左旁有井爲金沙井徑西爲東
溪寺寺前爲廊背爲白馬廟皆岐出府治東橫街又前
右兩巷爲上下竹樹巷井爲竹樹井左一巷爲景鳳山
巷巷口新建育嬰堂山有真武廟即舊志之景德觀下
有井爲鳳眼井廟右爲鳳凰臺臺高爲龜嶺龜岡古通
稱也橫街歷級而上爲縣岡坡上有元帝閣即雲峰拱

秀閣經縣城隍廟縣治直至四賢坊交衢從閣右迤爲
白家嶺達靈山廟左迤而下爲米汁巷至康公廟折而
西出州前爲均井巷過廟稍前兩下相對右即唐子巷
左即龜嶺直前爲東園鋪爲姚衙前極於紙巷曲徑右
前小巷一達嵯峩寺一達呂屋巷明姚指揮宅基在其
左宅旁有井爲東園前井井旁有巷東接旂竿西接通
利坊嘶馬池池上巷曲通者則龜嶺景鳳山攀高鋪由
東園前井對巷爲單井巷巷有井即單井井畔路旁出
即呂屋巷出單井爲棉布街上接排頭街下盡行司廟
自廟前而上右經郎公祠右轉鐵爐巷上則過進士謝
詔石坊坊左即鳳凰池池下有井即鳳凰池井池上有

祠舊祀謝桓慈今併屬山陝會館之關帝廟矣池右爲
黃仙觀觀有雷壇今皆爲民居池左爲壇背巷外通中
塞稍前右轉爲嵯峩寺巷過此即入排頭街接龍船廟
由建春門入皆東北門也與湧金門樓堞相連門以
內舊各設兵馬司垣內馬道下抵湧金門上接誠信街
直前西對觀音閣折而北爲磁器街舊志又謂劍街由
米市達唐步唐步者亦城東門也在左營署前今塞街
左爲柴巷入巷左轉爲梁屋巷繞出觀音閣右爲燒餅
巷右轉爲西來菴達鐵爐巷直前高處爲雲峰塢通世
臣坊過柴巷稍前爲馬齊巷又前爲曹老巷入巷小徑
右出爲施公巷今塞出曹老巷橫通鐵爐巷曲而前爲

龍船廟街之通衢處爲行司廟樟樹棉布兩街相接從
觀音閣南轉爲壇前上壇觀在其左舊志所謂陰街自
上壇觀達軍院前也觀左稍前有小巷通誠信街爲興
隆巷壇前折而西街盡處爲六合舖右通梁屋巷左達
油槽巷暨東門井巷曲而前爲姜家巷巷左爲老古巷
亦達東門井出姜家巷爲世臣坊坊東爲東門井西爲
上下龍船廟下廟左巷達鐵爐巷對巷井爲龍船廟井
上廟左爲古城巷過此巷即排頭金魚坊矣由世臣坊
南曲而西爲三佛堂因開池得三古佛像而名俗訛爲
生佛交衢四會五達北合古城西合會府南合青龍井
暨打磬巷是爲五路口

贛州府志

卷十一

府街市

十五

按張尚瑗云蕭生相經既助余贛乘之役以餘力撰
郡城坊巷一篇生長於斯言之不啻疊疊如讀越絕
華陽諸編爲志家一開生面其說是已然中間於郡
事古蹟半多點綴今畧就原文刪去別見者附錄於
城池志中比於三輔黃圖東京夢華之例云

雩都縣城池

雩都故城有二晉孫權置南部都尉城於灌嬰舊壘在治
南五里武帝改郡仍其址旋移章貢間宋武帝改南康
國復城於雩都陳武帝永定二年戊寅攻城縣東南仙
桂里大昌村隋大業九年癸酉徙東溪唐高祖武德五
年壬午復徙大昌村太宗貞觀五年丁卯仍遷今治立

土城高二丈六尺厚一丈五尺濠自北關折西派左自北而東盡智門寺右自北而西盡永安門唐末城圯土基僅存宋紹興十五年乙丑縣令劉藻縣尉王觀光增砌以磚明年圯四之二開禧四年丁卯縣令趙希閔補築紹定間縣令鄭仲度復修元初毀末年始詔築城至正十三年癸巳通判王榮忠署縣仍舊基修築圍五里崇一丈三尺建六門東曰迎曦西曰登豐南曰通津北曰望雩東南曰雩壇西北曰小西上各建樓南臨大江三面爲隍濶一丈五尺工將訖梅賊奄至遂廢

明成化二十一年乙巳叅政秦民悅檄知縣羅肆修砌宏治二年巳酉兵備副使張璠建樓五座立門五知縣

贛州府志

卷十一

雩都城池

十六

黃文鉞建警舖二十八間十四年辛酉主簿林洪建南門兵馬司三間十八年乙丑副使李宗泗檄知縣高伯齡關內外馬道正德七年壬申知縣劉天錫增高三分之一修警舖二十九座爲雉堞一千七百關外馬道一尋十三年戊寅夏圯知縣嚴鑾修十八年巳卯春復圯三十餘丈署縣事贛縣主簿梁珩修嘉靖五年壬午南薰門樓災典史郭尚逵重建二十七年戊申復災署縣事南安府通判韓息重建三十五年丙辰夏圯五之三副使游震德督知縣羊修重修邑人袁端黃宏綱先後爲記萬歷十年壬午洪水復毀南薰西成二門城垣知縣劉昌祚重修十五年丁亥知縣楊遇防水嚙城基增

砌南薰門外馬道二十一年癸巳知縣黃應元創設水障使趨南岸天啟三年癸亥南薰門災四年甲子署縣事通判蘇官召重建崇正十三年庚辰知縣鄭楚勳增築城垣視舊高三尺有奇每雉堞二并爲一西南築敵臺一座分巡副使陳士奇又令關內小馬道十四道十六年癸未知縣張魯傳築東北敵樓一座

袁記云雩都古揚州之域漢陳隋唐四徙其治貞觀中安撫使任公懷玉從治南康故郡即漢將軍灌嬰所築壘之故址迄今因之宋縣令劉公藻爰築土城元通判王榮忠始易以石於是民賴以安至我朝張文弛武城北隍湮邇年以來群不逞輩乘間嘯聚大叅秦公民悅

贛州府志

卷十一

雩都城池

十七

以雩當三省往來之衝爲十邑腹心之地遂區畫興築時閭右競出金穀以濟乃命知縣羅公肆司其事分命義官管廷薦劉紹易明李景珍景曾景茂以程其工秦公以陞去大叅張公琳兵備副憲張公璠相繼督勸申命義官蕭子欽等分方計日而責成焉始事於成化丙午春至明年冬城成又明年秋樓櫓成環甃磚石表裡如一周迴五里視舊加廣羅建五門表以新名南曰南薰北曰朝天東曰東臯西曰西成曰永安崇墉深塹雉列翬飛屹爲金湯所以衛內攘外弭變消虞維持太平於永久者不有在於斯乎工既訖功大役告成庠生蕭鳴鳳李稷胡馴嚴鑑黃三輩相率請予文鏡諸石以垂

示無極嗚呼重門待暴見於易有備無患著於書若是
役也固賢有司所宜用心者春秋常事不書興作創制
則備錄之是役也又法之所宜書者予不敏謹記其顛
末如此以爲後之生於斯仕於斯者告 黃記云雩都
居贛屬十邑之中接壤衆而憂虞廣由牛嶺隘南接信
豐而連龍南由豐田隘東接會昌而迫安遠山澤不逞
之徒闖道竊發則紛亂急遽不可爲備所藉而恃者惟
城爲要嘉靖三十五年丙辰四月十六大水驟至越七
月念三又水勢益驟而彌大後先並踰三日始落官廨
天廬公儲私蓄漂沒殆盡城堞之上可通巨艦城所不
浸者獨迤北一隅耳所傾覆者凡三百六十丈殘缺圯

壞徃徃如是父老訟言前所未聞今始駭觀傍徨咨嗟
相與謀曰寧無廬無寧無城於是邑侯鶴岡羊公履任
僅四閱月舉措張弛綽綽見其端緒顧已繫民之心矣
咸涕泣以訴於侯曰無城是無民矣廩無餘留矣帑無
餘支矣城將奈何侯曰我之責也若第勿置急於懷舉
事有序則功不勞而事易集否則徒爲做做耳咸應聲
曰諾惟侯命又曰家擇一人家衆者倍一人分城而督
之不復使毫髮費又曰城當濶處用磚丁四稍狹則三
面則複輒又應聲曰若是誠固矣美矣其如費何曰今
日固費他日之費猶甚也第爲之我且竭力矣乃戒窳
人曰磚固則城固磚速則城速值以時發磚以時至凡

窳之爲磚千爲日十次第而籍之則次第當至後至者
罰於城侯日至城而視之或再至或三至督城者私爲
糜以相餉侯爲之嘗其旨否於是諸凡益相勸六閱月
城成而風雨且過半矣城之外故有馬道道之外有池
池屬於民久日規月削道不盈三尺侯曰城基之不固
池之浸潤爲之也豈一朝一夕故哉自今馬路必盈丈
有不盈丈者罰於道民聞之爭相增築不匝月遂成孔
道於是邑之父老謳歌於城鼓舞於道舉欣然相告曰
官家舉事未有不經風搆不留積滯而能望其有成者
是城之修也出於倉卒成於速亟而要於鞏固縱令營
家立宅當不過是切切也咸來請余文以書侯之績余

敬受簡於父老曰古之有治行史書於其傳者各以其
一事表而見之蜀郡以興學書南陽以溉田書渤海以
弭盜書膠東以增戶書愧余非史氏責耳侯之修城固
宜表而見之者也侯名修瓊之儋州人

國朝順治十六年己亥知縣李祐之修葺五門城樓建瞭
樓康熙三十二年癸酉傾圮二十餘丈知縣趙愨修葺
四十三年甲申東南西城圮知縣盧振先修葺四十五
年丙戌復圮再加修葺築堤東南河岸四十餘丈以防
水患邑人曾紹侃記

記云雩屬贛上游當五邑之衝遙接閩廣山魃嘯聚乘
間竊發作雩保障實賴金城三面臨江春夏之交每遭

水決蒞茲土者屢修屢圮 國朝康熙甲申之五月洪水泛漲城不灌者僅北門數堞自起元門至南薰門下永安門城垣倒塌共計一百六十一丈四尺公解民居漂沒者十之三四兼前歲無收疫氣並作流亡載道入情洶洶邑侯盧公賑饑救溺撫循備至始有起色顧瘡痍方甚工築難興侯乃命伐木取竹編爲重柵爲暫時防禦計是秋有年遂捐俸漸修越二年丙戌又汨沒於洪濤間矣侯因思修築之費不下千金公帑既無所儲糧里又不可派會流寓粵地者頗漸殷盛欲附粵籍而苦無因侯因招之俾佐城工費隨其願力所輸填入粵籍於是四鄉響應歡欣樂助前後彙收計銀若干侯旋

撥耆老總理其事於丙戌年某月大興工築堅緻牢穩視昔爲加侯又時親慰勞越丁亥三月而大功告竣先是城南濠口地最早水最猛修後輒圮侯乃令運巨石堅砌堤障以殺其勢至是屹然金湯矣茲役也計費千金而坊廂里甲絲毫無與即一工一磚咸給現錢夫民之凋敝久矣使承大旱大疫大水大饑之後少累里民民將不堪又何以作吾粵之保障乎哉今侯乃不擾一民不斂一錢於談笑指顧間俾流寓者鼓舞踴躍以從事則侯之廉能才幹誠足爲後來任茲土者法而又以慶雩民雖時遭不造幸遇侯之來有以拯之也侯諱振先字孝則三韓人

信豐縣城池

信豐縣城唐以前無考宋嘉定三年庚午縣令萬億修築
圍五百四十九丈建門六東曰拱日西曰禾豐北曰朝
天南曰民信西北曰清平東北曰安定又建四望亭於
城南隅即覽秀亭後圯明洪武二十三年庚午守禦千戶汪
澍通志作淵增高一丈五尺建警鋪十四雉堞一千一百八
十有二成化元年乙酉知縣李玉又增高五尺二十三
年丁未山賊破城都御史金澤副使張璠檄知縣倪俊
修葺正德九年甲戌都御史周南檄知府朱諫給官帑
增築五丈嘉靖十六年丁酉堞傾過半十七年戊戌知
縣徐鑾修築二十三年甲辰都御史虞守愚檄知縣沈

贛州府志

卷十一

信豐城池

二十一

學重修較舊崇五之一隆慶六年壬申都御史李棠開
迎秀門於學宮前建文昌閣於其上天啟中塞崇正十
四年辛巳知縣王六如增峻城墉添設警鋪加葺敵樓
國朝順治七年庚寅城圯數十丈知縣吉允迪修十二年
乙未至十四年丁酉知縣陳誥楊宗昌相繼修葺康熙
三年甲辰知縣張繼掄增修敵樓警鋪十五年丙辰知
縣劉治國因廣寇圍城增堞濬濠康熙三十六年丁丑
知縣方正玉復開迎秀門仍建閣其上乾隆二十五年
庚辰知縣程化鵬倡邑人修葺並記

記云贛爲郡地大而民殷粵嶠咽喉形勢要害唯信豐
實居上流爲郡屏障信完則郡益固故重郡尤重信也

信有城周若干里初始增修具詳舊志自明楊萬諸遺
臣據郡以來繼以韓逆人任往來蹂躪迭更兵燹未免
頽夷百餘年間世際昇平不警烽火城之堅圯聽之矣
今

聖天子懷保群生於御極之二十四年 命所在城垣並
亟修治以爲捍衛民咸感激奮動於是吾信紳士耆老
相率集於令之庭曰維古有言城以盛民也今愛我民
故修城以衛民請富者捐資貧者効力以蕪厥事時乃
採石於山陶甃於野董事諸君實心經理諏日鳩工畚
築既萃百堵具興經始首春告成秋杪崇墉屹然山川
壯色夫然後郡城屏障益堅而閭閻之保護尤至億萬

贛州府志

卷十一

信豐城池

二十二

念 年金湯之固也余忝令是邦既嘉夫趨事慕義之勇尤

聖天子教養之澤淪浹而周遍故感應之機若是其神也
爰爲文鐫石以垂來禩

宋羅椅拱日門詩云桃江抱城來武山排闥入杲日出
扶桑橘紅蘸溪濕公退倚朱欄萬象俱收拾無數喚舟
人砂頭雁行立 安定門詩云

闕二

楊柳樹長繫渡頭

船隔岸幾人家青林吐炊煙飛鳥逐林間遊魚躍深淵
物各適其性於人胡不然 禾豐門詩云城西路平夷
五里近水南旭日明高岡瑞烟鎖叢杉時和歲豐稔歸
人多醉酣仙臺玉簫聲對景思鸞駮 清平門詩云行

行西復西稍喜市聲靜征夫指前途望望梅花嶺淡烟
鷄犬村落日牛羊逕忽見荷鋤人喚起歸田興 民信
門詩云南山天馬來南城下盤踞前撞古寺鐘後搨譙
樓鼓我來俯崔嵬山靈相呼舞年豐民物熙細聽閭閻
語 朝天門詩云駕言出北門長橋拱日外雙溪東西
來到此而始滙人言似章貢玉虹夾其背擬作合江亭
景物無小大 明李得輔次韻云東方朝日升和氣隨
風入古城瞰蒼江湖落沙痕濕遠浦客舟歸雲帆漸收
拾遙望武山巔亭亭翠屏立 安定俯東流門外多江
舩靈官古祠下垂柳籠青烟灘聲響鼙鼓驚起蛟龍潛
景物觸吟興詩成信偶然 林壑何處美諸峰翠西南

贛州府志

卷十一

信豐城池

二十三

遙望真仙宮翠葆生松杉誰家塘有蓮夕照方紅酣恨
不隨白鶴柳陰少停驂 時清民物安關柝長寂靜漁
歌渡竹橋樵唱登穀嶺曉雨桑麻村春風桃李逕一笑
倚欄杆飄然發清興 南山高岑律近對如虎踞民富
俱信豐鼎食鳴鐘鼓七里層灘高浪滾雪花舞古寺隱
翠微時聞喧梵語 朝天路通津出入關西外西江合
東流波瀾汨相滙長橋枕溪岸行人踏鰲背際茲雍熙
世山郭日亭大 羅椅覽秀亭詩云燕賀初成百尺臺
一新粉堞更週迴水流東北交虹去山自西南擁翠來
瓦縫參差千戶密市城翕合六門開賓儔眺望從今始
佳氣隨風入酒杯

興國縣城池

興國縣平固故城在縣北百二十里隋時省宋太平興國七年壬午始置興國縣初未建城元至正十二年壬辰判官玉榮忠攝縣事拓地築城二十三年癸卯縣尹陳文彬立甕城覆以敵樓周圍四百四十五丈高一丈三尺濶一丈東南阻水西北爲隍深三尺五寸廣一丈五尺長二里三十步城門六已塞者二今開者四東曰興教西曰惠化南曰奉符北曰泰和歲久城圯隍塞明成化乙巳知府李璉檄同知章廷珪知縣達泰重修宏治六年癸丑都御史金澤檄知縣陳壽重修增建警鋪後城鋪多圯十八年乙丑知縣曾選白於巡按御史臧鳳

知府趙履祥給官帑修葺正德五年庚午流賊破城本府推官黃紋署縣事重修十三年戊寅復圯九十餘丈贛撫王守仁檄知府邢珣給官帑修嘉靖二年癸未至萬歷三十三年乙巳間屢圯知縣李菽易道源李雲龍何應彪王芮吳宗周相繼修理四十七年己未城圯數十餘丈知縣蔡鍾有修

國朝順治五年戊子山寇破城七年庚寅署縣事贛守備李若垠修十四年丁酉知縣黃之麟修石堤二十餘丈高二丈以護城基康熙十六年丁巳東南城圯十有餘丈知縣黃惟桂捐俸督修易以石基磚堞並築周圍馬墻高七尺四十三年甲申東西南三面城皆圯知縣張

尚瑗捐俸倡修又築石隄於西門利濟橋自爲記乾隆
七年壬戌城堞內外俱圯知縣靳樹藻領帑修葺
張記云激瀦二水流至興國北隅而合始建縣者因其
濟以爲垣東垣自北而南其下行者不得駢肩西垣則
小春澗之水若抱若折繞南闔出雙橋以合於激江故
興之爲縣三面瞰水也城北岡巒坡陀南趨而勢庫南
北垣相去纔里許高下已數仞小春之濠狹不容舳舻
秋嘗涸爲陸春潦至則溢涌突盪溢濠而蓄城激江受
濊水之合固決然江也渚於龍王潭以平川爲名其實
嶮仄激疾不能紆徐容納春夏之交水潦驟發渚涯兩
渙不辨阡陌孤城之不勝其衝暴有由來矣自前令黃

君惟桂力起修之後二十六年遂無版築者予甲申履
任之春四望鮮有完堞霑霖四閱月汀贛諸郡邑載胥
及溺壞田廬隳城郭水入興國南門高七尺城之東南
崩者四十丈再南而崩者二十餘丈西南十七丈城居
如坐魚笥羊牢日以攘竊流移爲懼救荒政舉秋穫有
成乃召工計之工以難告訊其故曰始築者基未固也
陸城之法擬於築墻水城之法擬於築堤法亦有二江
河之堤其下土也故用埽用春以禦其衝潰谿澗之堤
其下石也石與石相承不拔之基矣今始爲城者未諳
其法欲樹不拔之功非窮其底不可予曰諾吾志也乃
發民夫劓土深數尺而山根露鑿坎以承石登登而築

之土下築基之石較土面培垣之石費加三分之二其四十丈當水之衝突所糜工費較他處獨當五分之三所役之夫起於烟竈程以日計石取於瀧下水數以船計輒與石灰則召陶人而爲甃凡沙石輒灰之值工匠之工皆視齊民惟工傭半給之起十月朔至十二月下浣八十餘日爲費四百緡耆老里民勸輸居三之一官獨捐其二而城以完丙戌之夏雨甚城復毀毀於甲申之未繕者數處而新繕之處亦有二焉予慚而詰諸工工曰非石工之罪操墁者之責也城之厚裁及丈石甃其外而土實其中驗城之址凡石築者無毀而上之近女墻者多毀由巧墁之偷竄未能合中邊而一之也於

是春谿漲盛名瀧下伐石者出穀以收其亂石絡繹百餘艘委積於城下秋潦涸而復起工石之用抵陶人之輒數十金以連歲興作不復募之民間或好義者仍樂助不以登穀所捐橐百餘金夫役視昔鳩工同日而以十二月初旬終事西閩之濠水從小春澗來者過三台巖經利濟橋疾注城下尋丈之地嘗衝箭激乙酉水發岍盡潰城幸未動予作水障三以殺水始爲木檠竹藩竒柳埽之製歲一更之斲以全岍今亦易以石不虞衝溢矣嗟乎坏城郭完堤防備水潦皆先王之政守土者所宜有事而修陣繕隍昔賢每以此彰治績焉以蕞爾小邑區區拮据於尋丈之間又一勞之未艾而至於

再舉尤無足稱道惟匠石所陳之言或足爲山陬水郭
備營繕之一法而節嗇民財諮詢一得因地隨時以自
竭其心力則庶幾黽勉不敢告勞焉至於土疏而易潰
谿灘迅駛決蓄不常南楚瘴濕淫澇爲害是在任事者
思艱圖寧以求無負乎保障而必謂此城之屹如金堤
冀他年得免於胼胝又非予之所敢知也

會昌縣城池

會昌縣城宋紹興間縣令黃鉞始築周圍二里五十步高
一丈五尺三面阻水南爲濠廣十丈深六尺長一里五
十步明洪武二十二年己巳守禦所千戶彭英增拓二
百步通計二里二百五十步上建樓四雉堞九百五十

贛州府志

卷十一

興國城池

二十七

七警鋪八舊門六元時塞小南小西二門存其四東曰
雙清西曰麗澤南曰鎮湘北曰臨清敵臺二座在鎮湘
門左右副千戶牛壽增高五尺正千戶白天祥建二亭
於上正德七年壬申副使王秩檄知縣林信千戶牛壽
暨陳偉督工重修圍四百五十丈增高五尺又增警鋪
十三嘉靖三十五年丙辰城圯知縣陳士修萬歷四十
二年甲寅知縣冒夢齡修

國朝順治五年戊子寇圯七年庚寅知縣王洵修自爲記
康熙十三年甲寅粵寇告警知縣王凝命建東西二銃
閣二十七年戊辰城東傾圯二十九年庚午署縣事陳
琅修四十年辛巳東北城圯知縣徐嵩倡修四十七年

戊子知縣董霍重修並四城門樓皆撤而新之旋爲水
圮五十三年甲午知縣黃鶴重修乾隆七年壬戌知縣
仲作楫毀東鉞閣開小南門額曰清華建二層樓於上
副使朱陵題其額曰湘江第一樓

王訒云凡城之有門門各有樓所以司啓閉定晨昏捍
收圉非獨觀臨之美也會邑經戊子之變垣突如濠湮
如探丸颺舉者尚伏莽百里外興乘利爲奸予奉

命司土誼不敢以繕完城邑後諸政事然登高而望之民
居離析炊烟落落如晨星可數今卽爲通邑計安危豈
能絀其身家之所急者而圖之乎既受事之三載年漸
豐民漸定四郊之烽火漸息乃僉議計工積月累時作

贛州府志

卷十一

會昌城池

二十八

正南者爲南薰樓自南而西者爲含清樓自西而東者
爲鏡虹樓三樓既建邑之薦紳元生李君爵佐葉君聯
芳率督事者劉慶章等謂不佞宜留一言於石示將來
子曰是何敢忘諸士大夫之功哉昔人有治田而自懼
其不力者朝而藝焉暮而芟焉手足胼胝汨汨終身而
禾不加穫東鄰之子過而相謂曰子何不使家督經始
亞旅持籌若諸疆以者之盡操鎛而荷耒乎何者蓋獨
服則難爲功衆起則易爲力也今幸賴諸君子相與以
有成如臂運指指無異心如督治家家無岐政民不忘
令令豈敢忘諸士大夫哉巍巍其制壯麗其觀司啓閉
者於斯捍牧圉者於斯更爲俯檻徘徊見夫清波委屬

松石排江舳艫尾啣烟火鱗次鷗鳧之所以出沒風日之所以吹暄固不爲臨觀也即以云臨觀亦豈有不脩乎登斯樓者亦可以慨然而歎矣

羊角堡城在朗溪明嘉靖二十二年癸卯贛撫虞守愚委兵備副使薛甲議建城垣復令贛推官林天駿守備官謝勅度地計工城闢三門周圍三千尺高三十尺有奇把總李尚監造尚書歐陽德記

記云江右列郡十三贛州邊東南當其上游外控漳汀湖惠閩廣之裔壤地參錯盤山藪盜時出沒剽劫而安遠會昌間則羊角水爲之咽喉盜踰羊角水以西則襲長沙營掠雩都信豐贛諸縣爲擾以北則攻會昌西犯

贛州府志

卷十一

會昌城池

二十九

吉東侵撫建諸郡爲擾故羊角水置堡屯戍卒隸會昌守禦千戶所與長沙營守備都指揮部兵相爲聲援蓋古者遮要害遠斥埃之義而堡卒單弱盜來不能偵至不能禦則閉門自保堡傍居民千餘家數遭毒虐守備官棄長沙營領所部寓會昌城中而堡益孤懸矣嘉靖癸卯大中丞東厓虞公撫臨茲土既擒捕諸縣逋寇乃復修長沙營使守備官部兵還居之次將議羊角水堡會居民群聚來訴願自出力築城爲衛而官董其成公移書兵備副使薛君甲薛君按行還言堡以衛民而僻枕山隈與民居相去里許緩急非益譬以民委盜而爲之資糧館舍者如城居民移戍卒城中民倚城爲固

藉卒爲壯小警自可支猝有大警益增兵戍上之相便
擿其巢窟下之奮武遏其奔突盜至無所掠欲深入又
狼顧恐吾議其後制勝之上也報公公可聞之撫按撫
按稱善申勅所司並心一力敬須公畫乃使守備官謝
勅贛推官林天駿度地計工未行而民搯畚鍤板榦俟
矣已而木工以尋引斧斤至石工以椎鑿至搏埴諸工
亦各以其器至採山伐谷陶澗之濱木石瓴甃自餘諸
物不督咸集公出米於廩出金於府役給之稍工給之
傭物給之直諸役競勸百堵皆作未踰時而城成周三
千尺高三十尺有奇關門三面公館中居屹然巨鎮表
裏齒辱盜不敢窺郡縣吏士申民之情來屬文紀事始

予惟事弗豫無備弗因周功豫者先乎幾因者順乎人
語曰虎攫而奔主人修門言無及也斯民蓋嘗傷於虎
者智人觀未形况灼灼若是乎雖然弗專弗察弗斷弗
果故專者事之幹也國家置總憲行臺控江湖閩廣之
交簡命憲臣提督四省軍務所轄八府二州官方民事
無不得問者然而奉璽書行便宜曰兵機戎政張弛緩
急四省倚爲安危其最要者也此八府二州各統於其
省之撫按官而撫按官治之視其他郡縣嘗略以爲兵
機戎政璽書有專責焉使一聽於提督不可參也爲提
督者或以其智之所及無巨細無所不問爲撫按者亦
以其位之所臨無詳略無所不問故智分於提察權撓

於參差惟東厓公略細而務大提綱而振目日惟簡軍實蒐卒伍申賞罰相機宜摘發奸慝落其牙距薙厥由葉四履日靖軍聲大振猶懼變生於所忽顛顛以求若將不暇乎其他故能智無遺慮炳幾灼情動罔弗時撫按諸公亦惟忠於謀國不私有已凡公所畫或聞而弗議或議而弗違若將拱手以仰其成故能乘時遵會不牽道舍之謀嗟夫慮精於一荒於泛功隳於參默於需獨此城也乎哉是役也費不甚鉅而所關至重保障係乎一方而其道可施之天下故予樂誦其成以爲理國者率是道而由之庶績可幾而凝非謂東厓之功爲極乎此也

贛州府志

卷十一

會昌城池

三十一

國朝順治五年戊子廣寇攻破城垣守備張淳補葺康熙四年乙巳守備杜應元重修加高堞口添設窩鋪銃閣周學易記

記略云粵稽堡城之設始於有明嘉靖二十二年巡撫虞公兵備薛公以黃鄉堡之亂從干長周廷試議特疏請建堡城報可遷羊角水堡築城三百餘丈爲防禦要衝地工成民德兩公立祠祀之示不忘也迨承平日久城漸傾圯順治戊子金王之變遂爲廣寇所破堞口砲臺盡皆頽塌堡無完城幾二十年守戎張公淳稍爲補葺功亦足稱焉今

上御極之四年薄海內外率皆賓服尤急急注意用人而

會昌羊角堡雖一隅之地當三省咽喉之區扼吭制要
必得才略超衆威望素著者以彈壓之會薊北杜公以
勦寇功籍甚一時僉以其名聞用是特擢公公以乙巳
夏來鎮茲土簡士卒勤訓練設防佈汛設艘巡河區畫
措置靡不精當五載於茲最績縷縷而公惓惓弗稍置
於心者祇以修築堡城是亟因捐俸營辦灰石諏吉鳩
工戴星出入躬自董率經始於辛亥冬十月越明年春
乃告成事焉是役也上不糜庫帑下不斂民錢捐已以
益公勤勞以衛民宜堡城之父老子弟嗣歌杜母鐫石
銘勲猶向之尸祝虞薛兩公並世世勿替也故誌之

國朝張拓羊角營口占云羽林啣命越崢嶸旗鼓山腰

贛州府志

卷十一

會昌城池

三十二

駐目兵三省分疆多鎖鑰一軍橫制壯干城猶頭蹲踞
千峯繞羊角迂迴二水縈閫外何須憑設險方今海內
誦昇平

安遠縣城池

安遠縣城元以前未建明洪武間知縣周泰指揮張可始
築土城以禦廣寇成化二十一年乙巳知府李璉加木
柵以固城基宏治四年辛亥兵備副使張聰知府周鳳
檄知縣甘文紹課民陶甃爲城高一丈七尺有奇廣一
丈三尺圍四百餘丈爲雉堞八百池深五尺廣一丈一
尺周迴四百一十丈建城門三曰迎薰曰拱極曰賓陽
環以月城建樓一座曰鎮山警舖十二正德十三年戊

寅夏城圯四十餘丈警舖十間都御史王守仁知府邢
珣檄知縣鄧守重修嘉靖四十年辛酉知縣石廩增高
曰尺四十四年乙丑東西二門圯知縣李多祚重修萬
歷五年丁丑兵使向程增庫補疎崇正元年戊辰城爲
了漚賊所破八年乙亥贛撫潘曾紘捐金二千兩委同
知謝時旦董修從西循東擴城四百八十弓增堞三百
九十警舖一百一十三改迎薰門曰向明增小南門曰
太平小西門曰說安邑人凌于葑記明末二小門塞
凌記云贛郡之有安遠自梁建治千有餘載其去土城
築堅城自宏治辛亥始也距今二百四十歲廢興創徙
之故載在邑志諸記可指數已崇正戊辰春流寇嘯聚

攻其不備中外竄驚人民罹害視曩日三巢寇禍爲倍
慘進謀者謂守城先在寬城易曰容民畜衆孫子曰善
守者敵不知其所攻蒞茲土者目擊風景增其式廓寧
詎無意或以時詘而難舉羸或以遂巡而重改闢前貽
後仍率以爲是固不可圖也七具甚矣歲甲戌查盤李
公嗣京張公振聲前後周視安城心愴徃寇慨然曰城
內居民寥落將若之何因准通學生負寬城狀上之督
撫潘公守道徐公巡道林公郡守劉公乃委本府二守
謝公來攝縣築度地闢城豈弟作孚躬行激勸不毀民
居不派民財公董厥要而分督工役則與奉委代捕鄧
經歷一德一心共勦巨任不避祁寒暑雨稽勤隋察堅

瑕又爲之刈曹鳩工若者徵窳戶若者督匠師若者供
輸輓若者給草木若者應水石與泥灰所謂萃五事之
敬合五行之氣恪其懋勉乃崇爾址乃闢爾墉從西箭
樓循東箭樓寬四百八十弓雉堞三百九十口新立南
門臨水面山縈紆迴繞登斯城也巨哉觀乎邑得此而
益壯矣經始於乙亥冬十月明年霜降至遂告成事然
且費出公帑力取諸雇直士庶倡義者聽其樂輸自非
鼓舞躬親敏惠孚洽宜不及此以廓地利以闢人文千
載一時矣城峻園橋師儒合邑父老欣謂形勝再造保
障功垂屬對記其年月對竊惟舉大事動大衆德怨居
半以二百餘年之安城門闢於一旦殆天所以假手我

公耶惟君子爲政苟有利於民即髮膚無所愛而况關
係接壤預杜窺伺豈細故哉昔范文正公作郡當夫歲
凶尤急繕城議者率以識大體歸之今邑春夏告荒荒
且甚非公之至誠惻怛區畫周詳何以城工浩大歷一
寒暑而克有終也費而若無所費勞而若無所勞德聲
不作怨謗不生德怨兩忘由於未始病民故也行將爲
聖天子鞏金湯於萬禩寧兢兢報效院道重託已哉謝
公名時旦華容人代捕鄧經歷名元旦湘城人是爲記
國朝康熙五年丙午復開小南門十八年己未東西城圮
八大有奇二十年辛酉知縣于作霖捐俸修築雍正十
年壬子知縣王鴻雁修西門城樓

龍南縣城池

龍南縣城宋隆興元年癸未縣令段秀實始作土城高丈圍三百五十丈東北濱河西南浚濠長四百二十丈濶一丈深半之建四門北門後塞明洪武十五年壬戌寇圮成化元年乙酉巡按陳選檄知縣謝澤課民陶甃爲城高一丈五尺廣一丈二尺圍四百二十丈爲雉堞七百五十有奇建城樓三座舊塞北門上亦建樓曰望江後廢宏治元年戊申復圮知府李璉葺治建警舖二十二間以居防守者濬濠設三石閘以瀦水二年己酉知縣張文增建警舖三間正德七年壬申山賊徐允富擾境通判徐珪增築加高五尺九年甲戌東門樓圮知

贛州府志

卷十一

安遠城池

三十五

縣李聰重建十三年戊寅春城圮二十餘丈署縣事推官危壽白都御史王守仁知府邢珣給官帑重修嘉靖三年甲申主簿蘇珪再修九年庚寅城圮過半十年辛卯都御史陶諧命同知伍佐甃完萬歷三年乙亥知縣王繼孝重加修治周四里有二百武高視舊加三尺廣視高城五之一雉堞舖舍如舊崇正九年丙子都御史潘曾紘命署縣譚心學擴城垣近千丈周六里餘高二丈有奇雉堞九百餘門六東曰拱翠東北曰朝陽南曰昭華正南曰向明西曰西成西北曰鎮安十三年庚辰知縣卓震增高四之一

國朝順治三年丙戌知縣呂應夏因昭華門外寇警濬濠

深四尺廣四之循城橫過一百數十丈直達西河五年
戊子流賊破城六門俱燬七年庚寅知縣賈程誼修葺
十三年丙申朝陽門火十六年己亥知縣高光國重建
十八年辛丑又建護龍臺於北城城內外水皆滙流於
朝陽門左右閘洩於渥江康熙三十三年甲戌城圯過
半知縣鄭世逢修五十九年庚子又圯知縣徐上修復
易護龍臺曰鎮龍

長寧縣城池

長寧縣城明萬曆三年乙亥知府葉夢熊奉都御史江一
麟題准建縣馬蹄岡檄安遠知縣沈文淵度地築城周
圍四百六十二丈九尺高一丈八尺雉堞九百有奇警

贛州府志

卷十一

龍南城池

三十六

舖六爲門四東曰春旭南曰絃歌北曰阜成小東曰陽
和覆以敵樓後建鎮山樓置大砲六位崇正九年丙子
加高三尺

國朝康熙九年庚戌西城圯二十餘丈知縣并廠重修後
知縣蔡賓興重建南門樓自爲記
記云余初至邑聞視城垣雉堞之圯毀輒鳩工修補復
其舊規而絃歌門樓岌岌將墮即欲葺而新之以新至
任未暇也迨壬寅公餘乃進邑紳士而語之曰城有敵
樓所以鞏守禦亦所以壯觀瞻方今

聖主當陽德威遐訖山陬之民外戶不閉何急乎此樓然
邑僅四門自東至北三樓巋然而南樓獨頽然將廢其

若觀瞻何矧茲門號絃歌則文教寓焉所闕非細余將
謀所以新之紳士皆曰諾乃召匠庀材是斷是度爲陶
爲甃木之費八而磚瓦之費二余捐俸金一百六十有
奇紳士復不憚勤勞旦夕董其役經始於七月至臘月
而工告成言言翼翼如草如飛視東北之樓加麗焉日
前之觀瞻壯矣傳云豫備不虞善之大者也是雖余之
不揣綿力綢繆未雨然非諸君子之踴躍匡襄亦不能
相與以有成由是吾邑之民皆將顧名思義服習詩書
興起仁讓庶無負絃歌之目歟是爲記

黃鄉司城初隸安遠今在縣西南八十里明嘉靖二十三
年甲辰贛撫虞守愚兵備副使薛甲議建周圍一百二

十五丈高一丈五尺雉堞二百有零門曰鎮定覆以敵
樓少宰歐陽鐸記乾隆六年辛酉巡檢張艷重修
歐陽記云贛江省邊郡也其屬皆巖邑牙錯閩廣之間
而安遠尤僻遠編戶十里爲保者二十七而黃鄉尤深
阻大帽山跨連三省去治遠旁邑又懸不相及賊穴其
中斷西南二路蘭石布梁搭節無道可間異時掉臂往
來莫有問者正德初四出掠縣臨吉爲弗寧朝廷用陽
明王公督軍務始議征之調集大兵用葉芳爲鄉導二
年克平芳死有衆七千其兄春領之久益縱居民不能
完其妻孥壬寅之變戕官殺軍而遁東崖虞公守愚適
奉簡命至有以攻瑕之策獻者公笑而不言密與兵備

副使薛君甲籌機略竟不煩重兵縛春父子磔於市
葉金撫定其衆首賊曾祖華者與金爭長金黨殺華因
而解散者三百人父老咸喜更生而不能無懼公大臣
當歸天子左右薛大夫行叙遷去如後何其智者則曰
鑿事當於其近救患必於其所致往者多故非由官兵
不相及然耶今請於黃鄉中處設立巡司督兵以議增
隄備官提卒相與犄角如是則節短而應疾然野宿亦
不可常必築城堡濠塹其外內爲公館營房以待官兵
居守又請自縣達各保皆立小學聘師爲子弟式庶幾
意與法存以徼惠於無窮相率懇於督府下兵備兵備
下縣勘議物土田舍皆爲稱費欲乞諸鹽稅之餘工役

則百姓願盡力瑞金知縣趙勲覆之加詳焉薛大夫受
而欣然曰難得者時易失者機賊平而民情若此機矣
督府公明仁愛豈於爾民惜費耶茲有大利者三強梗
彈壓則有所不敢爲惠潮之寇顧後則不敢深入土兵
有室家則心繫緩急惟吾所用之或曰小學之立文乎
哉曰化俗所以弭盜其勢緩其功遠矣東崖受而斟酌
焉具本末驛聞得設添巡司乃檄有司出稅餘斬刈蓬
藿建立城堡凡若干丈中爲公館右爲巡司小學附館
之左營房附司之右雉堞雄固層巒失險旗幟明鮮鷹
隼來翔蕞爾黃鄉遂與大縣等嗟乎地利之不可已也
孫子五事二曰地其言形變詳矣然必知變而後得形

得形而後利可居也黃鄉於法爲隘爲圯爲爭爲交中
豪傑多矣而莫有議及者事固有待耶聞之治兵如治
疾嘗之以平劑雖不奏功亦不致斥後而病日深不可
治此則養之之過也金石草木鳥獸毒烈之味峻投之
病亦已然而死亡繼之此則決之之過也不求近效不
幸後功除疾務盡衛生務周表裡司命不必其身之常
留非妙達脈理而誠有愛人之心者不能於乎黃鄉之
城文武之事具焉方諸除疾衛生尤大且悉室家笑語
與伊吾聲蟬連相聞豈惟今日將百世是賴豈惟南贛
諸邑唯是臨吉惠潮汀漳延袤千里可無突門毀垣之
虞矣於乎豈非仁人之功哉

按縣志畧云黃鄉司城嘉靖時贛撫虞公守愚始築
添設巡檢司併移安遠隄備之兵駐劄其地與弓兵
相兼防守但地界和平龍川距安遠縣城二百里舊
爲葉賊巢穴斗城孤立危若累卵江公一麟決計剿
滅葉賊乃建縣城於馬蹄岡城勢偏西北黃鄉新坪
兩巡司俱在縣南相距七八十里而縣治扼其上游
地邑居民叅相得也自建縣後閩粵劇賊猶出沒黃
鄉如謝志良許其達葉魁龍等蜂擁蟻集旋滅旋起
迄三藩亂定邑治無事又新坪司城向設丹竹樓密
邇平遠象湖之境繼乃移署於雁洋坪其間地廣民
稠所轄雙橋爲邑南偏大保故始自大墩三徙而墨

食於此云

定南縣城池今爲廳

定南縣城明隆慶三年己巳知府黃宸奉都御史張翀檄會同署安遠知縣同知李多祚署龍南知縣同知龔有成信豐知縣陳瀾詣高砂蓮塘相度築城鑿池城周圍三里有奇凡四百四十六丈崇一丈有三尺廣七尺爲雉堞七百八十警舖十有六城門三東曰迎陽西曰平成南曰豐埠各覆以樓北向立一臺亦覆以樓曰北樓南城舊有民塘濬而深之爲池皆主簿陳宗舉巡檢王承恩督修萬歷五年丁丑都御史江一麟委知府戴記議寬城垣一百二十丈加高三尺廣如之增雉堞五十有

贛州府志

卷十一

長寧城池

四十

四警舖一萬歷九年辛巳城圯知縣劉世懋重修典史李學敏督工復以舊城脚地易田擴城計濶六尺長一百二十丈掘而爲池崇正十五年壬午知縣鄭賢楨折巽塔塼增加城堞 國朝順治五年戊子城樓雉堞爲賊所毀十四年丁酉知縣祝天壽造西北二樓警舖二十間典史袁耀督修康熙十五年丙辰六坊賊破城焚燬悉盡二十年辛酉知縣林詵孕捐俸重建東西南樓三座三十六年丁丑復圯知縣吳邇立捐修

下歷城明嘉靖四十五年丙寅贛撫都御史吳百朋平下歷冬十月築城建館移置捕盜通判主簿各二員統兵駐劄防守另於高砂蓮塘築土垣移駐下歷巡檢司協

守隆慶三年己巳都鄉史張紳復築蓮塘城設定南縣
巡檢司仍還下歷 國朝順治九年壬辰橫岡營守備
王昌祚寓此招兵修雉堞康熙二十年辛酉巡檢柴鳳
廉重修城垣

論曰豫章城築於漢潁陰侯灌嬰雷次宗豫章記書
之於是江西所屬諸郡縣立自漢初者皆云灌嬰築
城今贛縣雩都古漢縣也志亦沿其說而實無明文
可據然嶺北兩郡僅漢三縣地贛郡已兼其二故城
池首建仍以二邑爲權輿焉况介在南服閩粵有事
徃徃先窺贛城以故所屬諸邑自晉唐宋元明以來
各城不無兵燹之患兼之水蓄城基屢修屢圯畚鍤
之工仍仍登登而不遑給甚至築堤冶鐵以爲固前
守令之爲捍衛計者周矣我 國家定鼎削平羣寇
底績三藩自康熙二十年以後贛之四境清寧城郭
完固地利人和兼而有之所異蒞斯土者時切未雨
之綢繆俾億萬斯年金湯永謐贛之人將惠徼福利
於無窮焉

寧都三州縣城池附

寧都縣子城唐太和六年壬子知縣事王揆始築周顯德
五年戊午章仁績增修宋紹興初縣令劉僅重築紹定
六年癸巳縣令趙紉夫大修之是年始築外城至嘉熙
元年丁酉訖工元延佑二年乙卯重修至正六年丙戌

耆民曾志遠等募修門六東二曰通濟曰迎旭西二曰登豐曰秋成南曰阜民北曰鎮安明正統十四年己巳知縣周昂重修成化初同知程鶴建樓於六門二十二年乙巳知縣金瀾增建宏治十五年壬戌通判馬伯昂修正德十一年丙子通判莊潤修十三年戊寅知縣王天與復修嘉靖四十年辛酉都御史陸穩塞阜民門改建新門於學宮前易名文明萬歷甲戌署縣趙南金盡撤其故崇正間流寇擾境邑人溫國奇彭魁等倡建新城爲門七曰長庚曰拱辰曰拱秀曰德義曰陽和曰朝陽曰集賢合舊城凡十三門

瑞金縣城始建歲月無考元至正十三年癸巳判官王榮

贛州府志

卷十一

定南城池

四十二

志修築東南角當二水之衝建拱日樓以鎮之明永樂

二十二年甲辰

張志作洪武甲辰誤

千戶劉廣重修宏治三年庚

戌推官張獻千戶李宣等陶甃修砌圍五里城門四東

曰朝陽南曰觀瀾西曰抱秀北曰朝闕皆建樓其上正

德元年丙寅掌縣事照磨杜偉修後知縣林裡增築九

年甲戌知縣葉繼本重修十三年戊寅知縣鮑珉重修

嘉靖十九年庚子知縣王弢周石砌築改建南門額曰

達觀二十年辛丑知縣趙勳重修東西北三門三十七

年戊午知縣程宗聖增修隆慶四年庚午知縣呂若愚

闢一門曰宣文萬歷十四年丙戌知縣喬杞復修

國朝康熙三十七年己巳

郊拓宣文門而新之改名大成門

建其上曰翰閣

石城縣城宋建炎間邑人陳能及子敏與縣令牟其弼謀築土城建五門明洪武初知縣吳德源修成化二十二年丁未知縣開詔陶甃改築爲門五北曰迎恩南曰南薰東曰望西曰瑞寧小西曰安仁署縣李寬訖工五門各建敵樓易西門曰康阜南曰清遠北曰環秀宏治四年辛亥推官張憲增高西城十八年乙丑通判謝珪推官鄧德純復加高西城正德六年辛未又加高四尺十年乙亥知縣錢季玉修十三年戊寅都御史王守仁給官帑修築嘉靖三十五年丙辰知縣戊守曉役修

國朝順治六年己丑寇破七年庚寅城悉圯知縣董應舉

贛州府志

卷十一

寧都瑞金

四十三

修八年辛卯復修建四門敵樓北曰拱辰南曰迎薰東曰升曦西曰鞏金十一年甲午知縣郭堯京繼修康熙六年丁亥知縣陳嘉改復南門於舊所額曰迎禧

贛州府

上諭亭在府治望闕臺之麓舊爲縣學宮規模宏敞高踞全城乾隆元年丙辰督撫從諸生請遷建學宮於紫極宮改奉

萬壽牌於此恭逢 聖節示 長至慶典文武官員屆期 昧劣有集行禮 望敬謹宣講

上諭宣畢恭藏亭內

贛縣附郭

雩都

上諭亭雍正十三年乙卯知縣傅誠因憲司舊址建

信豐

上諭亭雍正十三年乙卯知縣陳乃志因大王廟舊址建

乾隆八年癸亥移塔下寺前

興國

上諭亭在訓導署右知縣梁聯德因書院舊宇改建

會昌

上諭亭在東大街北雍正十三年乙卯知縣范興毅因院

司舊址改建

安遠

贛州府志

卷十一

上諭亭

四十四

上諭亭在縣治南雍正十三年乙卯知縣戴彬暢因嶺北

道分司舊址建

龍南

上諭亭在縣城南門內乾隆 年知縣方秉義即龍城書

院正廳改建

長寧

上諭亭舊在阜城門內雍正十三年乙卯知縣陶正士因

分司義學舊址改建

定南

上諭亭在廳治北分司前雍正元年癸卯知縣李化龍建

乾隆二十五年庚辰知縣胡澤洪重修